


Mes piz: Il Crap da Flem

DA SANDRO BUCHLI/FMR

■ Mes piz n'ha betg in piz. El n'è betg in piz classic. Ad el manca il piz sco quai ch'ins spetga dad in piz. El è in pau sco in toc Toblerone, tar il qual ins ha murdi giu il piz. U en plets pli sacral per lecturs religius, sco i stat scrit en il Lexicon Istorico Retic: «Il Crap da Flem stat sco in altar en la cuntrada cultivada.»

Contemplond il massiv para quel da vulair dir al homo sapiens ch'el haja schon vesì bler e ch'el vegnia il pli probabel a surviver noss raz. Avant 10 000 onns ha el sbuvà la Foppa e furmà la cuntrada cun differents lais, l'Uaul Grond e la Ruinaulta. Questa bova è stada ina da las pli grondas bovas da crappa dal mund. As imaginai quant grond ch'il Crap da Flem è stà avant la gronda bova! Davent da Bargis è el da cuntanscher en ina flotta spassegiada. Per alpinists pli curaschus è la via sur il Pinut pli captivanta. Cun cletg pon ins schizunt vesair in u l'auter capricorn. Cura ch'ins è arrivà ina giada sin il Crap da Flem pon ins cuntinuar il viadi enfin il Plaun da Segnes, per davent da là forsa giudair in picnic sin ina bellezza planira.



ILLUSTRAZIUN FMR

Cifras e fatgs

Num:	Crap da Flem, numnà era Crap Tgietschen
Autezza:	2694 meters sur mar
Ascensium:	Davent da Bargis circa tschingt uras.

En ina seria cun il titel «Mes piz» preschenta la redacziun da la FMR quests dis mintgadi in piz-tranter Müstair e Tschamut. Quella «pizzeria» vali la paina da scuvrir questa stad da «distanza», cun chaminar enfin sisum u alura era mo cun contemplar ils pizs da sutensi, sco lieu da desideri.

